

悅

心

集





悅 心 集

清 世 宗 選

叢書集成初編

(補印本)

悅 心 集

一九三九年十二月初版
一九六〇年五月補印

清 世 宗 選 輯

商 務 印 書 館 出 版

上 海 虹 口 印 刷 廠 印 刷

御製悅心集序

朕生平澹泊爲懷。恬靜自好。樂天知命。隨境養和。前居藩邸時。雖身處繁華。而寤寐之中。自覺清遠閒曠。超然塵俗之外。然不好放逸身心。披閱經史之餘。旁及百家小集。其有寄興蕭閒。寓懷超脫者。佳章好句。散見簡編。或如皓月當空。或如涼風解暑。或如時花照眼。或如好鳥鳴林。或如泉響空山。或如鐘清午夜。均足以消除結滯。浣滌煩囂。令人心曠神怡。天機暢適。因隨意採錄若干則。置諸几案間。以備觀覽。自總理萬幾以來。宵旰不遑。求如曩時之怡情悅目。不可復得。然寧靜之宰。不因物動。□澹之致。□□境移。此乃可以自信者。爰□□□錄彙爲一書。名之曰悅心集。夫心者。人之神明。所以爲萬化之源。萬事之本。而勞之則苦。擾之則煩。蔽之則昏。窒之則滯。故聖賢有存心洗心之明訓。佛祖有明心寂心之微言。無非涵養一心之冲虛靈妙。使無所累。與天地太和元氣。渾然流行。無入而不自得也。如孔門之春風沂水。仙家之吸露餐霞。如來之慧雨香花。以及先儒之霽月光風。天根月窟。其理同。其旨趣何弗同耶。是編所錄。有莊語。有逸語。有清語。有趣語。有淺近語。不名一體。人有仕。有隱。有儒。有釋。有高名。有無名。亦不專一家。總之或□□妄。屏慮釋思。寄清淨心。遊歡喜地。言近指遠。辭簡味長。俯仰之間。隨時可會。然而喧寂在境。而不喧不寂者。自在心。往往跡寄清廓之鄉。而神思縈擾。身處塵氛之地。而志氣安舒。則見道未見道之。

分也。昔朗禪師以書招永嘉禪師山居。師答曰。未識道而先居山者。但見其山。不見其道。未居山而先識道者。但見其道。必忘其山。見道忘山者。人間亦寂也。見山忘道者。山中乃喧也。旨哉斯言。知此義者。始可與讀悅心集。

雍正四年丙午正月初三日御筆

悅心集卷一

清世宗選

樂志論

仲長統

使居有良田廣宅。背山臨流。溝池環市。竹木周布。場圃築前。果園樹後。舟車足以代步涉之難。使令足以息四體之役。養親有兼珍之膳。妻孥無苦身之勞。良朋萃止。則陳酒肴以娛之。嘉時吉日。則烹羔豚以奉之。躊躇畦苑。遊戲平林。濯清水。追涼風。釣游鯉。弋高鴻。風於舞雩之下。詠歸高堂之上。安神閨房。思老氏之元虛。呼吸精神。求至人之彷彿。與達者數子。論道講書。俯仰二儀。錯綜人物。彈南風之雅操。發清商之妙曲。逍遙一世之上。睥睨天地之間。不受當時之責。永保性命之期。如此則可以陵霄漢。出宇宙之外矣。豈羨夫入帝王之門哉。

仲長統字理公。東漢末山陽高平人。少好學。瞻文辭。

錄漢書疏廣傳一則

廣既歸鄉里。日令家共具設酒食。請族人故舊賓客。與相娛樂。數問其家金餘尚有幾。趣賣以共具。居歲餘。子孫竊謂其昆弟老人廣所愛信者。勸說君宜買田宅。廣曰。我豈老諄不念子孫哉。顧自有舊田廬。令子孫勤力其中。足以共衣食。今復增益之以爲贏餘。但教子孫怠惰耳。賢而多財則損其志。愚而多財則

益其過。且夫富者衆之怨也。吾既亡以教化子孫。不欲益其過而生怨。又此金者。聖主所以惠養老臣也。故樂與鄉黨宗族共饗其賜。以盡吾餘日。不亦可乎。

按漢書疏廣字仲翁。東海蘭陵人也。漢地節中爲太子太傅。兄子受爲少傅。朝廷以爲榮。廣謂受曰。吾聞知足不辱。知止不殆。功遂身退。天之道也。遂上疏乞歸。許之。賜黃金二十觔。既歸鄉里云云。

歸去來辭

陶潛

歸去來兮。田園將蕪。胡不歸。旣自以心爲形役。奚惆悵而獨悲。悟已往之不諫。知來者之可追。實迷途其未遠。覺今是而昨非。舟搖搖以輕颺。風飄飄而吹衣。問征夫以前路。恨晨光之熹微。乃瞻衡宇。載欣載奔。僮僕歡迎。稚子候門。三徑就荒。松菊猶存。攜幼入室。有酒盈樽。引壺觴以自酌。眄庭柯以怡顏。倚南窗以寄傲。審容膝之易安。園日涉以成趣。門雖設而常關。策扶老以流憩。時矯首而遊觀。雲無心以出岫。鳥倦飛而知還。景翳翳以將入。撫孤松而盤桓。歸去來兮。請息交以絕遊。世與我而相遺。復駕言兮焉求。悅親戚之情話。樂琴書以消憂。農人告予以春及。將有事於西疇。或命巾車。或棹孤舟。旣窈窕以尋壑。亦崎嶇而經邱。木欣欣以向榮。泉涓涓而始流。善萬物之得時。感吾生之行休。已矣乎。寓形宇內復幾時。曷不委心任去留。胡爲乎遑遑欲何之。富貴非吾願。帝鄉不可期。懷良辰以孤往。或植杖而耘耔。登東皋以舒嘯。臨清流而賦詩。聊乘化以歸盡。樂夫天命復奚疑。

陶潛字淵明。或云字元亮。晉大司馬侃曾孫。潯陽柴桑人也。宅邊有五柳樹。因以爲號。著五柳先生傳。以自況。嘗爲彭澤令。屈於上官。曰。吾不能爲五斗米折腰。遂解組歸。賦去來辭。

桃花源記

陶潛

晉太元中。武陵人捕魚爲業。緣溪行。忘路之遠近。忽逢桃花林。夾岸數百步。中無雜樹。芳草鮮美。落英繽紛。漁人甚異之。復前行。欲窮其林。林盡水源。便得一山。山有小口。髣髴若有光。便捨船。從口入。初極狹。纔通人。復行數十步。豁然開朗。土地平曠。屋舍儼然。有良田。美池。桑竹之屬。阡陌交通。雞犬相聞。其中往來種作。男女衣著。悉如外人。黃髮垂髫。並怡然自樂。見漁人。乃大驚。問所從來。具答之。便要還家。設酒割雞作食。村中聞有此人。咸來訊問。自云。先世避秦。率妻子邑人來此絕境。不復出焉。遂與外人間隔。問今是何世。乃不知有漢。無論魏晉。此人一一爲具言所聞。皆歎惋。餘人各復延至其家。皆出酒食。停數日辭去。此中人語云。不足爲外人道也。既出。得其船。便扶向路。處處誌之。及郡下。詣太守。說如此。太守卽遣人隨其往。尋向所誌。遂迷不復得路。後遂無問津者。

答人

陶弘景

山中何所有。嶺上多白雲。只可自怡悅。不堪持贈君。

陶弘景字通明。丹陽秣陵人。博學好養生。仕齊爲奉朝請。挂冠隱居茅山。性愛山水。每經澗谷。必吟咏。

盤桓梁武帝既早與之遊及卽位以手敕詔之不出然國家每有大事必先諮之時謂山中宰相年踰八十而有壯容

與顧章書

吳均

僕去月高尙還覓薛羅梅溪之西有石門山者森壁陵霞峭峰限日幽岫含雲深谿蓄翠蟬吟鶴唳水響猿鳴英英相雜緜緜成韻既素重幽居遂葺宇其上幸富菊花偏饒竹實山谷所資於斯已辦仁智所樂豈徒語哉

吳均字叔庠吳興人梁奉朝請

言志書

蕭大圓

北山之北南山之南面修原而帶流水倚郊甸而枕平皋築蝸舍於叢林構環堵於幽薄近瞻烟霧遠睇風雲藉纖草以蔭長松結幽蘭而援芳桂仰翔禽於百仞俯泳鱗於千尋果樹在後開窗以臨花草蔬圃居前坐簷而看灌叻二頃以供饘粥十畝以給絲麻侍兒五三可充紕織家僮數四足代耕耘沽酪牧羊協潘生之志畜雞種黍應莊叟之言穫菽尋汜氏之書露葵徵尹君之錄烹羔豚而介春酒迎伏臘而俟歲時披良書探至蹟可以娛神可以散慮有朋自遠揚摧古今田畯相過劇談稼穡斯亦足矣

蕭大圓字仁顯蘭陵人隋開府儀同三司

答馮子華書

王績

吾河渚間有先世田十五六頃。結構茅屋并廚廩。總十餘間。奴婢數人。足以應役。用天之道。分地之利。耕耘蕪蕪黍稷而已。多養鳬雁。廣牧雞豚。黃精白朮。枸杞薯蕷。朝夕採掇。以供服餌。牀頭素書數帙。莊老及易而已。每遇天氣晴朗。詠謝康樂詩。渺然盡陂澤山林之思。覺瀛洲方丈森然在目前。或時與舟子漁人方潭並釣。俯仰極樂。戴星而歸。歌咏以會意爲工。不必與悠悠閒人相倡和也。煙霞山水。性之所適。暮春三月。登於北山。松柏羣吟。藤蘿翳景。意甚樂之。賞洽興闌。還歸河渚。蓬室甕牖。彈琴誦書。優哉游哉。聊以永歲。足下謂何如也。

王績字無功。文中子之弟。

攝生咏

孫思邈

怒甚偏傷氣。思多太損神。神虛心易役。氣弱病相侵。勿使悲歡極。當令飲食均。再三防夜醉。第一戒晨嘔。夜寢鳴雷鼓。謂叩齒晨興漱玉津。謂漱唾妖神難犯己。精氣自全身。若要無百病。常當節五辛。安神宜悅樂。惜氣保和純。壽夭休言命。修行本在人。時時遵此理。平地可朝真。

孫真人思邈。京兆華源人。隱太白山。通百家陰陽推步醫藥。隋文帝以國子博士召不就。唐太宗召詣京師。欲官之。不受。高宗上元初還山。

遊澶湖山寺詩

張說

空山寂寞道心生。虛谷迢遙野鳥聲。禪室從來雲外賞。香臺豈是世中情。雲間東嶺千重出。樹裏南湖一片明。若使巢由同此意。不將蘿薜易簪纓。

張說字道濟一字說之洛陽人武后策賢良方正說對第一擢鳳閣舍人旋謫欽州中宗召還累遷兵部侍郎睿宗朝爲中書侍郎知政事開元初進中書令封燕國公諡文貞朝廷大述作多出其手與許公蘇頌齊名號燕許大手筆

冰壺誠

姚崇

玉本無瑕冰亦至潔方員相映表裏皆澈喻彼貞廉能守其節吳隱酌泉龐恭致水雖清畏人知而所知遠矣告爾在位祿厚官尊固當聳廉勤之節塞貪競之門冰壺是對炯戒猶存以此清白遺其子孫姚崇字元之陝州人唐同平章事

山中與裴迪書

王維

近景氣和暢舊山殊可過憩感配寺與山僧飯訖而去北渡瀾川清月映郭夜登華子岡輞水淪漣與月上下寒山遠火明昧林外村墟夜春復與疏鐘相聞此時獨坐僮僕靜默多思疊昔攜手賦詩步仄逕臨清流也當待草木蔓發春山可望輕儵出水白鷗矯翼露溼青皋麥隴朝雉斯去不遠倘能從我遊乎非

子天機清妙。豈能以此相邀。然是中有深趣矣。
王維字摩詰。唐天寶間人。官尚書右丞。工畫。

春日行

張籍

春日融融池上暖。竹牙出土蘭心短。草堂晨起香薰人。家僮報我園花滿。頭上皮冠未曾整。直入花間不循徑。樹樹殷勤盡繞行。攀枝未遍春月生。不用積金高至天。不用服藥求神仙。但願園裏花長好。一生無事花前老。

張籍字文昌。吳人。唐國子司業。

九曲詞

高適

萬騎爭歌楊柳春。千場對舞繡麒麟。到處盡逢歡洽事。相看俱是太平人。
高適字達夫。唐刑部侍郎。散騎常侍。封渤海縣侯。

畫松

景雲

畫松一似真松樹。且待尋思記得無。曾在天台山一見。石橋南畔第三株。

景雲。唐時僧。與岑參同時。

平都觀記

段文昌

平都山最高頂，卽漢時王陰二真人修道之所也。峭壁千仞，下臨湍波。老柏萬株，上插峰嶺。瑤花綵羽，皆非圖志中所載者。昏旦萬狀，信非人境。貞元十五年，西遊岷蜀，停舟江岸，振衣虔潔，詣諸洞所，石晶雲竇，蒼然相次，苔蘚古書，依稀可辨。時與道侶數人坐於下，須臾天籟不起，萬竅風息，山光耀於耳目，烟霞拂於襟袖，相顧神竦。若在紫府縣圃矣。

段文昌字墨卿，唐西川節度使。

池上篇

白居易

十畝之宅，五畝之園，有水一池，有竹千竿。勿謂土狹，勿謂地偏，足以容膝，足以息肩。有堂有庭，有橋有船。有書有酒，有歌有絃。有叟在中，白鬚飄然。識分知足，外無求焉。如鳥擇木，姑務巢安。如魚居沼，不知海寬。仙鶴怪石，紫菱白蓮，皆吾所好，盡在吾前。時飲一杯，或吟一篇。妻孥熙熙，雞犬閑閑。優哉游哉，吾將終老乎其間。

白居易字樂天，下邳人。唐貞元中進士，元和初對制策入等。歷年穆宗、文宗，官至刑部尚書，諡曰文。自號醉吟先生，亦稱香山居士。詩與元微之齊名，時號元白體。

冷泉亭記

白居易

東南山水，餘杭郡爲最。就郡言，靈隱寺爲尤。由寺觀，冷泉亭爲甲。亭在山下水中央，寺西南隅，高不倍尋。

廣不累丈而撮奇得要地。搜勝槩物無遁形。春之日。吾愛其草薰薰。木欣欣。可以導和納粹。暢人血氣。夏之夜。吾愛其泉淙淙。風泠泠。可以蠲煩析醒。起人心情。山樹爲蓋。巖石爲屏。雲從洞生。水與階平。坐而翫之者。可濯足於牀下。臥而狎之者。可垂釣於枕上。矧又潺湲潔澈。粹冷柔滑。若俗士。若道人。眼耳之塵。心舌之垢。不待盥滌。見輒除去。潛利陰益。可勝言哉。斯所以最餘杭而甲靈隱也。杭自郡城抵西封。叢山複湖。易爲形勝。先是領郡者。有相里尹造作虛白亭。有韓僕射□作候仙亭。有裴庶子棠棣作觀風亭。有盧給事元輔作建山亭。及右司郎中河南元冀最後作此亭。於是五亭相望。如指之列。可謂佳境殫矣。能事畢矣。後來者雖有敏心巧目。無所加焉。故吾繼之述而不作。

郡中西園

白居易

閒園多芳草。春夏香靡靡。深樹足佳禽。旦暮鳴不已。院門閉松竹。庭徑穿蘭芷。愛彼池上橋。獨來聊徙倚。魚依藻長樂。鷗見人暫起。有時舟隨風。盡日蓮照水。誰知郡府內。景物閑如此。始悟喧靜緣。何嘗繫遠邇。

燕詩示劉叟

白居易

叟有愛子。背叟逃去。叟甚悲念之。叟少年時亦嘗如此。故作燕詩以諭之。

梁上有雙燕。翩翩雄與雌。銜泥兩椽閒。一巢生四兒。四兒日夜長。索食聲孜孜。青蟲不易捕。黃口無飽期。觜爪雖欲弊。心力不知疲。須臾千往來。猶恐巢中飢。辛勤三十日。母瘦雛漸肥。喃喃教言語。一一刷毛衣。

一旦羽翼成。引上庭樹枝。舉翅不回顧。隨風四散飛。雌雄空中鳴。聲盡呼不歸。卻入空巢裏。啁啾終夜悲。燕燕爾勿悲。爾當返自思。思爾爲雛日。高飛背母時。當時父母念。今日爾應知。

對酒二首

白居易

蝸牛角上爭河事。石火光中寄此身。隨富隨貧且隨喜。不開口笑是癡人。百歲無多時壯健。一春能有幾天晴。相逢且莫推辭醉。唱徹陽關第四聲。

負冬日

白居易

杲杲冬日出。照我屋南隅。負暄閉目坐。和氣生肌膚。初似飲醇醪。又如墊者蘇。外融百骸暢。中適一念無。曠然忘所在。心與虛空俱。

盤銘石

白居易

客從山來。遺我盤石。圓平膩滑。廣袤六尺。質凝白雲。文拆烟碧。莓苔有斑。麋鹿無跡。製之竹下。風掃露滴。坐待禪僧。眠留野客。清冷可愛。支體甚適。便是白家。夏天牀席。

憫農

李紳

鋤禾日當午。汗滴禾下土。誰知盤中餐。粒粒皆辛苦。

李紳字公垂。無錫人。唐武宗時。檢校右僕射平章事。封趙郡公。

答白居易

釋道林

元和中白居易出守杭州。入山禮謁。問如何是佛法大意。師曰。諸惡莫作。衆善奉行。白曰。三歲孩兒也解。恁麼道。師曰。三歲孩兒道得。八十老人行不得。

道林唐時僧。號鳥窠禪師。

陋室銘

劉禹錫

山不在高。有仙則名。水不在深。有龍則靈。斯是陋室。惟吾德馨。苔痕上階綠。草色入簾青。談笑有鴻儒。往來無白丁。可以調素琴。閱金經。無絲竹之亂耳。無案牘之勞形。南陽諸葛廬。西蜀子雲亭。孔子云。何陋之有。

劉禹錫字夢得。彭城人。貞元九年擢進士第。登博學宏詞科。從事淮南幕府。入爲監察御史。以王叔文黨貶朗州司馬。居十年召還。復出刺播州。裴度以母老爲言。改連州。再徵復黜。度仍薦爲禮部郎中。集賢直學士。白居易嘗稱其詩在處有神物護持。爲名流所推重。會昌時加檢校禮部尙書。

郊居卽事

司空曙

釣罷歸來不繫船。江村月滿正堪眠。縱然一夜風吹去。只在蘆花淺水邊。

司空曙字文明。

一作初

廣平人。登進士第。從韋臯于劍南。貞元中爲水部郎中。調虞部郎中。詩格清華。爲

大歷十才子之一

咏走馬燈詩

僧無際

團團遊了又來遊。無箇明人指路頭。除卻心中三昧火。鎗刀人馬一齊休。

無際石頭希遷禪師。端州高要陳氏子。唐貞元中人。落髮於曹溪。得法於青原。住南嶽寺。

尋張逸人山居

劉長卿

石磴纔通鳥道。空山更有人家。桃源定在何處。澗水浮來落花。

劉長卿。唐大歷間人。工詩。時稱五言長城。

垂訓詩

元真

行藏虛實自家知。禍福因由更問誰。善惡到頭終有報。只爭來早與來遲。閑中檢點平生事。靜坐思量日所爲。常把一心行正道。自然天地不相虧。

元真。洪州上藍令。超禪師。唐大順中人。住瑞州上藍山。

傳心偈

裴休

心不可傳。以契爲傳。心不可見。以無爲見。契亦無契。無亦無無。化城不住。述額有珠。珠是強名。城豈有形。卽心卽佛。佛卽無生。直下便是。勿求勿營。使佛覓佛。倍費功程。隨法生解。卽落魔界。凡聖不分。乃離見聞。